

Dari Ikhwan kepada Ikhwan

Kepada Sahabatku Anggota Ikhwan

“Kepada sahabatku anggota Ikhwan” demikian tajuk surat saudara Abdul Jalil Hassan (anggota Ikhwan: 248) dari “Madrasah al-‘Atṭās al-‘Arabiyyah” Johor Baharu. Isi surat saudara Abdul Jalil pada kali ini, kami pilihkan menghiasi halaman “Dari Ikhwan kepada Ikhwan” yang disediakan khas untuk sekalian anggota Ikhwan untuk mencurahkan buah fikiran yang membina. Hantarkanlah buah fikiran saudara tetapi biar ringkas dan padat, kami sedia menyiarkannya menurut giliran – Pengelola Ikhwan.



Oleh: Abdul Jalil Hassan.

Kita bersyukur kepada Allah Subḥānahu wa Ta‘ālā atas wujudnya persahabatan Ikhwan anjuran “Qalam” yang telah mendapat perhatian dan sambutan besar dari segala kalangan terutama pemuda-pemuda kita, yang sekarang anggotanya makin meningkat ramai. Tujuan persahabatan Ikhwan ini – sebagaimana yang sudah maklum – ialah menyatu padukan ahli-ahlinya dengan ikatan persaudaraan Islam, sambil memberi panduan supaya tiap-tiap seorang kita menjalankan perintah Allah dan menyebarkan seruan Islam di mana berada.

Di sini saya bawa pandangan saudara-saudara ke arah pemuda-pemuda kita hari ini dan perjuangan terhadap masyarakat. Jikalau kita perhatikan kedudukan pemuda dalam kalangan tiap-tiap bangsa – di timur atau di barat – akan terserlah kepada kita suatu hakikat yang tidak akan dapat disangkal lagi, bahawa pemudalah,

dari semasa ke semasa, dengan semangatnya yang berani dan niatnya yang luhur, sentiasa bergerak maju ke hadapan dan bertindak membentuk perubahan untuk memperbaiki nasib agama, bangsa dan tanah airnya.

Dalam halaman akhbar-akhbar dan majalah, penuh dengan rangkaian tulisan dari orang-orang yang bijak pandai, memperkatakan soal pemuda dan tanggungjawabnya terhadap masyarakat. Pada hari ini, kita lihat pemuda-pemuda kita, bersiap sedia untuk mempertahankan nasib negaranya. Semangat keinsafan dan kesedaran mendesaknyanya supaya segera bangun menentang segala bahaya dan ancaman yang akan menimpa bangsa, agama dan negara.

Marilah saya bawa saudara-saudara sekalian menoleh ke belakang dalam zaman yang lampau yang telah tercatat di dalam lembaran sejarah. Kita akan dapati pemudalah yang banyak jasanya, dengan semangatnya yang tabah dan berani serta



*Sarji bin Haji Abdul Syukur dan Rahmah binti
Haji Taha dari Madrasah Yasiniyyah, Sungai Batang,
Bagan Dato' Perak. Mereka telah melangsungkan
perkahwinan baharu-baharu ini dalam suatu istiadat
yang meriah. (Kami ucapkan selamat sejahtera –
Q.)*

berpantang undur, mereka telah berjaya mempertahankan tanah airnya. dengan fikirannya yang waras mereka dapat memikirkan cara-cara yang baik untuk keselamatan bangsa dan negara. Begitulah kerap kali kita dengar pujian terhadap pemuda-pemuda yang telah terkorban di dalam perjuangannya. Pemuda adalah tiang agung sesuatu negara.

Ya! Tidak salahnya semboyan kalau memang pemuda itu berusaha bekerja untuk faedah bangsa dan agama akan tetapi di sebaliknya jika pemuda yang dikatakan tiang negara tadi tidak bekerja dan tidak berusaha untuk maslahat tanah air dan agama maka berertilah pemuda itu

menjadi pokok pangkal kejatuhan dan keruntuhan bangsanya.

Kita tidak sampai hati saudara, melihatkan bangsa dan negara kita sentiasa di dalam kejatuhan dan kemunduran yang begini rupa, dan kehidupan kita tertindih dan terbelenggu. Di dalam segala-galanya bangsa kita tercicir ke belakang tak berdaya lagi. Kemiskinan dan kesengsaraan itulah menjadi pakaian bangsa kita.

Saudara-saudaraku sahabat Ikhwan! Sedarlah dan insafilah, bangun membela dengan semangat yang tak boleh dipatah-patahkan oleh sesuatu anasir yang merintanginya. Tanamkan perasaan kuat kemahuan dan bercita-cita tinggi. Kasih kepada agama bangsa dan watan tanah air. Berkorban untuk kepentingan kita bersama bagi mempertingkatkan kalimah Allah. Bertindaklah memperbaiki masyarakat bangsa kita serta bekerja dengan giat jangan lekas berpaling dan berpatah hati sebelum kita sampai kepada cita-cita yang mulia dan muktamad iaitu kemerdekaan.

Sebagai ahli-ahli perjuangan agama yang suci, jalankanlah dengan sedaya upaya perintah-perintah Allah serta jauhkan segala larangan-Nya, dan sebarakanlah kepada masyarakat seluruhnya di mana-mana juga saudara-saudara berada, sebagaimana yang tercatat di dalam surat keanggotaan kita itu mudah-mudahan Allah akan menolong kita dengan memberi hidayah dan memberi taufik kepada anggota-anggota Ikhwan khususnya dan umat-umat Islam amnya.

[Cara yang sebaik-baiknya bagi membina kedudukan kita mengerjakan seruan-seruan seperti ini ialah kita sendiri masing-masing bekerja membetulkan diri supaya menjadi tauladan. Kemudian membawa kepada isi rumah kita bekerja seperti kita. Kemudian baharu ke luar rumah seperti yang diajarkan oleh junjungan kita (SAW). Dengan cara ini mudah-mudahan persaudaraan kita akan subur – Q.].